

漁洋詩集

一函
五冊
函

漁洋山人詩集序

六合李敬撰

將爲珠玉寶石象齒犀角之玩則必從千金之賈
列五都之市襲以緘縢藉以襜褕其光輝然肆映
而不可止然丈夫得之爲佩具婦孺得之爲簪珥
均不可必焉若夫盈尺之璞處於深山草木之所
蒙翳蛇虎之所盤旋日月之精蕩於其上雪霜之
嚴結於其下當國家之禎祥鬼神所貢效屢世而
一見焉其得之也非和氏弗名其琢之也非工師
弗成其登之也非郊廟弗陳然而其初塊然無容

彩色澤也田夫牧豎過之而弗視也以爲瓶罍杵
臼曾不如一石之用也是故君子亦志乎遠且大
者而已矣王貽上先生起家華胄自瑯琊徙新城
世爲名卿顯人年甫二十登進士甲科挾其所爲
詩文數十萬言以知名於海內可謂盛矣今世門
閥稍高或毛髮斑白博一第及掇拾章句通曉韻
語號爲聞人於先生之數者有一焉其能免於輝
然肆映而不止者耶噫抑從事於末而未之思也
先生有是數者而容益下器益邃且出其詩之俊
逸而中尺度者問於予將無志乎遠者大者以盡

去其輝然之光乎他日廟堂之上以文章揚一代
之盛者必先生也予無以測其至矣

漁洋山人詩集序

長洲汪琬撰

昔吳季子札聘魯魯人爲之歌齊嘆曰美哉泱泱
大國之風表東海者其太公乎而說者又謂齊音
敖辟而驕志何也予嘗誦齊詩自雞鳴以下凡十
有一篇皆哀襄時之詩爲多詩疏以爲哀公政衰
荒淫怠慢齊人變風始作然則所謂敖辟驕志者
蓋謂變風也自太公以來四公時之正風不傳久
矣意者子札其猶及見且聞之與故爲咨嗟太息
其美而思慕太公如此與孔子與子札同時及其

刪詩而不錄齊之正風獨存雞鳴以下十有一篇
豈孔子所見不逮子札與抑他有所爲與予惑之
舊矣予友王子貽上齊人也工爲詩又博雅好古
習知六藝之文往在京師時數相往還惜乎予不
能舉此以問貽上以辨正其所惑也貽上之詩緒
密而思深縱橫馳驟無所不可不蹈襲前人一言
一字庶幾盡破其所謂敖辟驕志之習以進於正
風者與使今世復有吳季子札宜何如爲貽上咨
嗟太息其美與抑使貽上得生孔子之世孔子豈
能盡刪其詩而不錄與然則貽上之所造可知矣

吳在孔子世爲夷齒于於越蠻荆之列故吳越荆
楚之詩皆不人三百篇至魯成公之九年吳始見
于傳然猶謂之句吳吳之言句者蓋其土語然也
自兩漢吳之賢士大夫文章功業遂卓然爭衡中
國訖于今日號爲文物之地古今時勢不同類如
此也以予之才與學在吳人中爲最謏劣者然幸
生子札之鄉雖不能爲詩而猶能知貽上之詩竊
欲自附于子札之美齊風貽上其許我乎貽上之
歸也常乞予爲序而予不暇以爲今者休沐無事
因道此以遺貽上且欲貽上爲予辨正其所惑焉

漁洋山人詩集序

崑山葉方藹撰

昔杜牧之答莊充書以爲自古文之有序皆後世宗師其人而爲之今與足下並生今世而欲序足下未已之文甚爲不可余竊以爲不然君子病無乎中而致飾於外亦病有乎中而不表見於外者其人之言不足以垂世而行遠與而吾比比焉徇時俗而寵譽之是導佞而貢諛也耻孰甚焉其人之言足以垂世而行遠與則雖與吾並時而生方將宗師之不暇而詠歌之而稱述之其可後乎間

持此意以相今人海內能言之士不爲少矣人自
以爲班馬家自以爲曹劉一言未出諛音四起考
其旨義十不獲一余雖未敢輕非諸口而亦未嘗
稍是於心嗚呼豈今人之言果無當於古人者與
抑瑰奇桀出之才世固恆有而予偶未之見與予
友王貽上弱冠舉進士文章之名遍滿天下不以
予爲弇鄙一旦出其詩數百篇屬爲之序余觀貽
上之詩根情苗言華聲實義上泝國風雅頌之遺
下極漢魏三唐才人之致蓋有乎中而表見於外
者也非無乎中而致飾於外者也其言之足以垂

世而行遠如此予雖與貽上並生今世卽欲不詠
歌之稱述之豈可得哉世之君子讀貽上之詩而
奮然以興油然以感磨礪濯厲以祈至乎古立言
之士無輕言著作而爲識者之所姍笑斯厚幸也
已

漁洋山人詩集序

宜興陳維崧撰

昔者孔子有言曰王者之迹熄而詩亡詩亡然後
春秋作孔子所謂詩亡何歟說者曰王室旣東文
武道缺一時懷文善誹之匹士類不能雍容恬雅
以悟其君王蓋激烈之義多而變風變雅出焉詩
之所以亡也吾以爲不然予所謂詩亡非作詩者
亡而作詩之教先亡也溫柔敦厚則詩之教也關
雎葛覃鹿鳴天保諸什無論矣平王以後其民流
而多思悲愁儉嗇而不踰乎禮身雖告哀乎邇岐

景亳之情未嘗一日離于懷也則猶未嘗一日離乎詩教也板蕩之世乃重傷之矣山崩川竭雷電燁燁配天之業不祀而明堂之位忽諸君子謂此其世可以史而不可以詩夫董狐倚相左丘明諸賢彼其才非遽遜於雨雪之征夫草蟲之戍婦也詠歌而悼歎之亦風人之致也惟是身經喪亂忍視爲越人之關弓而政教束濕難託於春人之助相不得已而以編年紀事之體沒其出風入雅之才而詩於是遂亡詩之亡也國家之不幸也貞臣誼士之所不敢出也勝國盛時彬彬乎有雅頌之

遺焉五六十年以來先民之比興盡矣幼眇者調
旣雜於商角而亢戾者聲直中夫鞞鐸淫哇噍殺
彈之而不成聲青絲白馬之禍豈侯景任約諸人
爲之乎抑王褒庾信之徒兆之矣亂極必返盍姑
俟之新城王貽上先生性情柔澹被服典茂其爲
詩歌也溫而能麗嫺雅而多則覽其義者冲融懿
美如在成周極盛之時焉吾聞君子欲覘世故先
審土風故太史陳詩公子觀樂矇瞍所掌蓋其慎
之今值國家改玉之際郊祀燕饗次第舉行飲
食男女各言其意識者以爲風俗淳厚旦夕而致

而一二士女尚憂家室之未靖閔衣食之不給焉
先生旣振興詩教於上而變風變雅之音漸以不
作讀是集也爲我告采風者曰勞苦諸父老天下
且太平詩其先告我矣

漁洋山人詩集目錄

新城 王士禎貽上 撰

卷一

丙申詩六十四首

卷二

丙申詩六十八首

卷三

丁酉詩四十一首

卷四

戊戌詩七十四首

卷五

巳亥詩五十三首

卷六

巳亥詩六十四首

卷七

庚子詩七十六首

卷八

庚子詩六十八首

卷九

辛丑詩六十一首

卷十

辛丑詩七十八首

卷十一

辛丑詩八十二首

卷十二

辛丑詩八十一首

卷十三

壬寅詩七十六首

卷十四

癸卯詩六十九首